

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine F BiH broj 49/06), člana 90. Statuta Općine Ilidža („Službene novine Kantona Sarajevo“, broj 33 /10, 18/16) na Prijedlog Službe za privredu i turizam, Općinski načelnik donosi:

**P R A V I L N I K**  
**O KRITERIJIMA, NAČINU I POSTUPKU DODJELE BUDŽETSKIH SREDSTAVA**  
**ZA POTICAJ RAZVOJU PODUZETNIČKE INICIJATIVE I ZAPOŠLJAVANJU NA**  
**PODRUČJU OPĆINE ILIDŽA**

Član 1.  
(Predmet Pravilnika)

Pravilnikom o kriterijima, načinu i postupku dodjele budžetskih sredstava za poticaj razvoju poduzetničke inicijative i zapošljavanju na području općine Ilidža utvrđuju se uslovi, kriteriji, korisnici, postupak dodjele budžetskih sredstava za poticaj razvoju poduzetničke inicijave registraciom djelatnosti i privrednih društava, izvor sredstava, namjena korištenja sredstava, kao i druga pitanja u vezi sa dodjelom ovih sredstava na području općine Ilidža.

Član 2.  
(Svrha Pravilnika)

(1) Svrha donošenja ovog Pravilnika je podrška mladim i ženama za razvoj poduzetničke inicijative koja će omogućiti: stvaranje novih radnih mjesta kroz samozapošljavanje mladih i žena sa evidencije nezaposlenih kao i povećanje broja samostalnih djelatnosti i privrednih društava na području općine Ilidža.

(2) Podrška mladim i ženama za razvoj poduzetničke inicijative na području općine Ilidža je u skladu sa Strategijom razvoja Općine Ilidža 2014-2020.(„Službene novine Kantona Sarajevo“, broj 27/15) i Zakonom o poticaju razvoju male privrede („Službene novine Kantona Sarajevo“ broj 29/15).

Član 3.  
(Korisnici sredstava)

Sredstava se dodjeljuju:

- a) Mladim, dobi do 35 godina, bez obzira na spol;
- b) Ženama, bez obzira na dob.

Član 4.  
(Uslovi)

Sredstva za najbolju poslovnu ideju se dodjeljuju mladim i ženama pod sljedećim uslovima:

- a) Mlada osoba koja nije starija od 35 godina u momentu raspisivanja Javnog poziva;
- b) Nalaze se na evidenciji nezaposlenih JU Službe za zapošljavanje Kantona Sarajevo - Biro Ilidža;
- c) Imaju prebivalište na području općine Ilidža;
- d) Poslovnu ideju će registrovati i razvijati vlastiti biznis na području općine Ilidža.

**Član 5.**  
(Namjena korištanja sredstava)

Financijska sredstva za najbolji poslovni plan se odobravaju za sufinansiranje troškova pokretanja biznisa kroz finansiranje troškova registracije biznisa, troškova sredstava za rad, zakupa poslovnih prostora, obrtnih sredstava i ostalih sredstava, prema navedenom u poslovnom planu;

**Član 6.**  
(Kriteriji)

(1) Kriteriji za izbor najboljih poslovnih planova i dobivanje budžetskih sredstava iz člana 1. ovog Pravilnika su:

<b>Vrsta djelatnosti</b>	<b>Bodovi</b>
<b>Proizvodnja</b>	<b>40</b>
<b>Intelektualne usluge</b>	<b>30</b>
<b>Usluge</b>	<b>20</b>
<b>Ostalo</b>	<b>10</b>

<b>Broj zaposlenih</b>	<b>Bodovi</b>
<b>Više od 10</b>	<b>40</b>
<b>7-9</b>	<b>30</b>
<b>4-6</b>	<b>20</b>
<b>1-3</b>	<b>10</b>

<b>Ocjena poslovne ideje</b>	<b>Bodovi</b>
<b>Odlična</b>	<b>30</b>
<b>Dobra</b>	<b>20</b>
<b>Uvjetno dobra</b>	<b>10</b>

<b>Ocjena poslovnog plana</b>	<b>Bodovi</b>
<b>Odličan</b>	<b>30</b>
<b>Dobar</b>	<b>20</b>
<b>Uvjetno dobar</b>	<b>10</b>

<b>Vrsta investicije</b>	<b>Bodovi</b>
<b>Vlastita</b>	<b>15</b>
<b>Kredit</b>	<b>10</b>

<b>Vrijednost investicije</b>	<b>Bodovi</b>
<b>&gt;15.000</b>	<b>15</b>
<b>10.000 -15.000</b>	<b>10</b>
<b>&lt;10.000</b>	<b>5</b>

Inovativnost	Bodovi
Djelatnost ne postoji	30
Djelatnost slabo zastupljena	20
Djelatnost postoji	10

(2) Predmet poslovanja poslovnog plana ne može biti djelatnost kockanja i klađenja.

(3) Vrijednost budžetskih sredstava po poslovnom planu može iznositi do 5 000,00 /pet hiljada/ KM.

#### Član 7.

##### (Objavljivanje javnog poziva)

(1) Sredstva se dodjeljuju na osnovu Javnog poziva koji objavljuje Općinski načelnik na prijedlog Službe za privredu i turizam.

(2) Javni poziv za raspodjelu sredstava iz člana 1. Pravilnika objavljuje se na web stranici Općine Ilidža i oglasnoj tabli Općine, Mjesnih Zajednica Općine Ilidža i JU Službe za zapošljavanje Kantona Sarajevo – Biro Ilidža.

(3) U dnevnim novinama će se objaviti obavještenje o raspisivanju Javnog poziva.

(4) Javni poziv za raspodjelu sredstava ostaje otvoren 45 dana od dana objavljivanja.

#### Član 8.

##### (Prijava na javni poziv)

Prijava na javni poziv za najbolji poslovni plan treba da sadrži:

- a) Poslovni plan na propisanom obrascu koji je sastavni dio ovog Pravilnika;
- b) Ovjerena fotokopija lične karte;
- c) Original ili fotokopiju CIPS-ove prijave prebivališta ne starije od 30 dana;
- d) Potvrda Službe za zapošljavanje Kantona Sarajevo - Biro Ilidža da se nalazi u evidenciji nezaposlenih ne starije od 30 dana;
- e) Ovjerenu izjavu da u prthodne tri godine nisu imali registovanu djelatnost ili privredno društvo na području općine Ilidža, da će dodijeljena sredstva iskoristiti za nabavku potrebnih sredstava za rad navedenih u poslovnom planu, registrovati i održavati vlastiti biznis; da će se nakon registrovanja vlastitog biznisa odjaviti sa evidencije nezaposlenih, da se u periodu od najmanje 12 mjeseci neće prijaviti na evidenciju nezaposlenih i da ranije nije koristio nepovratna sredstva Budžeta Općine Ilidža namijenjena poticaju privredi i zapošljavanju.

#### Član 9.

##### (Komisija za odabir korisnika novčanih sredstava)

(1) Odabir korisnika za dodjelu sredstava vrši Komisija koju imenuje Općinski načelnik.

(2) Komisija ima predsjednika i četiri člana, koji se imenuju iz reda državnih službenika Službe za privredu i turizam (2 člana), Službe za finansije (1 član), Službe za razvoj, komunalne poslove i puteve (1 član) i Službe za obrazovanje, kulturu, sport i informisanje (1 član)

(3) Administrativno - tehničke poslove za potrebe Komisije obavljat će Služba za privredu i turizam.

Član 10.  
(Odluka o dodjeli sredstava)

(1) Komisija razmatra pristigle prijave, sačinjava listu najbolje ocjenjenih poslovnih planova i listu registriranih privrednih subjekata, te utvrđuje prijedlog Odluke o dodjeli sredstava na osnovu kriterija iz člana 5. ovog Pravilnika.

(2) Komisija je dužna da utvrdi prijedlog Odluke iz stava (1) ovog člana sa obrazloženjem i dostavi Općinskom načelniku u roku od 30 dana od dana isteka javnog poziva.

(3) Odluku o dodjeli sredstava donosi Općinski načelnik, ista se objavljuje na zvaničnoj web stranici Općine Ilidža, a primjerak Odluke se dostavlja svakom podnosiocu prijave po objavljenom javnom pozivu.

Član 11.  
(Zaključivanje ugovora)

(1) Nakon donošenja Odluke o dodjeli sredstava, Općinski načelnik zaključuje ugovore koji sadrže prava, obaveze i odgovornosti, način praćenja realizacije odobrenog poslovnog plana, te obavezu finansijskog izvještavanja o utrošku sredstava kao i odredbe o uslovima i načinu raskida ovog ugovora.

(2) Sredstva će biti doznačena nakon potpisivanja ugovora prema naznačenoj namjeni u odobrenom poslovnom planom i namjeni naznačenoj u prijavi u skladu sa članom 4. Pravilnika.

Član 12.  
(Izvještaji)

Podnosioci prijave kojima su dodjeljena budžetska sredstva obavezni su Službi za privredu i turizam dostaviti opisni i finansijski izvještaj o realizaciji projekta sa kopijama svih računa i drugih dokaza koji su navedeni u poslovnom planu, nakon realizacije poslovnog plana, odnosno najkasnije do kraja kalendarske godine.

Član 13.  
(Praćenje zaključenih ugovora)

Realizaciju ugovorenih obaveza prati Služba za privredu i turizam na način da provjerava dokumentaciju koju je korisnik dužan dostavljati a kojom dokazuje namjensko trošenje sredstava.

Član 14.  
(Izvor sredstava)

Za realizaciju ovog Pravilnika sredstva su planirana u Budžetu Općine Ilidža – Grant za poticaj privatnim preduzećima i poduzetnicima i sredstva su nepovratna.

Član 15.  
(Informacije o utrošku sredstava i realizaciji poslovnih planova)

Služba za privredu i turizam dužna je Općinskom načelniku i Općinskom vijeću dostaviti Informaciju o utrošku sredstava i realizaciji poslovnih ideja na osnovu objavljenog javnog poziva po ovom Pravilniku.

Član 16.  
(Stupanje nja snagu)

Ovaj Pravilnik stupa na snagu narednog dana od dana objavljivanja, a objavit će se na web stranici Općine Ilidža i oglasnoj ploči.

Broj: \_\_\_\_\_

OPĆINSKI NAČELNIK

Datum: \_\_\_\_\_

Prof. dr. Senaid Memić